



USAID
HUSI POVU AMERIKANU



Polítika Implementasaun Polisiamentu Komunitariu iha Timor-Leste

Mahein Nia Hanoin Nú. 08, 30 Jullu 2015



Foto: PNTL, 2015.

Relatoriu Fundasaun Mahein Nia Hanoin ne'e suporta husi povu Amerikanu liu husi Ajénsia Estados Unidus ba Dezenvolvimentu Internasional (USAID)

Vizaun husi autor sira ne'ebé expresa iha publikasaun relatoriu sira ne'e la reprezenta vizaun husi Ajénsia Estados Unidus ba Dezenvolvimentu Internasional (USAID)

Website: www.fundasaunmahein.org

2015



Kontiudu sira

Kontiudu sira	2
Akronimu sira	3
Sumariu Ezekutivu	4
Introdusaun	6
Metodolojia	7
Planu Nasional ba Polisiamentu Komunitariu	7
Departamentu Polisia Komunitaria Nasional	9
Polisiamentu Komunitaria	15
Dezafiu ba Polisiamentu Komunitaria	22
Parseiru Internasional no Lokal sira	25
Konkluzaan	26
Rekomendasaun	27
Bibliografia	28
Aneksu 01: Enkontru no Konsulta	29
Aneksu 02: Lista Pergunta sira	31



Akronimu sira

CMM	Community Management Meeting
CPU	Community Policing Units
DPKN	Departamentu Polisia Komunitaria Nasional
HAKOHAK	Hametin Kooperasaun Polisia ho Komunidade
JICA	Japan International Cooperation Agency
KDD	Konsellu Dirativa Distrital
KDN	Konsellu Dirativa Nasional
KJP	Konsellu Jestaun ba Programa
KPK	Konsellu Polisiamentu Komunitaria
MI	Ministériu Interior
NGO	Non Governmental Organizasation
OPE	Ofisial Polisia Eskola
OPS	Ofisial Polisia Suku
PNTL	Polisia Nasional Timor-Leste
PPS	Postu Polisia Suku
SES	Sekretaria Estadu Siguransa
SSD	Security Sector Discussion
SV	Siguransa Voluntariu
TAF	The Asia Foundation
TLCPP	Timor-Leste Community Policing Programme
VIP	Vizibilidade, Involvimentu no Profesionalismu



Sumariu Ezekutivu

1. Polisiamentu komunitaria mai ho nia istoria naruk desde instituisaun PNTL harii ho evolusaun ne'ebé la'o no matenek ne'ebé aprende husi rai seluk. Polisiamentu komunitaria hanesan filozofia PNTL nian no nia aplikasaun la hare ba unidade, departamentu ka seksaun no serbisu sira maibe ba membru PNTL hotu-hotu hala'o polisiamentu komunitaria. Maske nune'e sei iha interpretasaun ne'ebé diferente husi membru PNTL sira katak polisiamentu komunitaria hala'o husi Departamentu Polisia Komunitaria Nasional. Signifika katak durante ne'e seidak iha sosializasaun ne'ebé diak kona-bá Lei Organika PNTL nian no Planu Estratejiku PNTL.
2. Polisiamentu komunitaria sai hanesan prioridade iha PEDN 2030, Planu Estratejiku Siguransa Interna 2030, Politika Governu nian no Planu Estratejiku PNTL 2014 – 2018. Iha Planu Estratejiku PNTL 2014 – 2018 nia modelu polisiamentu hakoak filozofia polisiamentu komunitariu, liu husi adopta doutrina VIP – Vizibilidade, Involvementu no Profesionalismu.
3. Nune'e PNTL dezenvolve ona rekursu prinsipal ida iha comunidade iha asaun sira siguransa iha pratika polisiamentu komunitaria. Rekursu siguransa ne'ebé PNTL ho parseiru dezenvolvimentu sira estabelese ona maka hanesan Konsellu Dirativa Nasiona (KDN) iha nivel nasional no nia kompozisaun mai husi Ministériu ne'ebé responsavel ba siguransa no Komandante Jeral PNTL iha nivel polítika no estratejiku.
4. Konsellu Jestaun ba Programa (KJP) nian kompozisaun mai husi Xefe Departamentu Polisia Komunitaria Nasional hamutuk ho parseiru dezenvolvimentu sira no lidera husi Sigundu Komandante Jeral PNTL.
5. Estrutura iha nível munisipiu ho naran KDD. Kompozisaun KDD mai husi Komandante Munisipiu, Administrador Munsipiu, Departamentu Interligadus ne'ebé kompostu iha área administrativu munisipiu nian no estabelese ona iha munisipiu 11.
6. Iha nível implementasaun atividade estratejiku kompostu husi KPK, SV, OPS no OPE. Atividade estratejiku hirak ne'e dezenvolve ona iha serbisu sira iha comunidade no involve comunidade sira sai na'in ba asaun sira siguransa nian. KPK estabelese ona iha suku 10 husi munisipiu 11 no total KPK hamutuk 110. SV estabelese ona iha suku 2 husi munisipiu Ermera no Viqueque. OPS koloka ona iha suku 410 husi munisipiu 12 no rejiaun Oe-cusse no OPE estabelese ona iha eskola 12 iha munisipiu Dili.
7. Maske nune'e sei iha difikuldade pertenente ida husi implementasaun polisiamentu komunitaria. *Premeiru*, baze legal ba KPK no SV; *Sigundu*, monitorizasaun ba KPK no SV; *Terseiru*, kondisaun OPS iha suku, la iha hela fatin, transporte, komunikaun no fasilidade seluk siguransa nian. Inklui kooperasaun institucional entre instituisaun Governu no sociedade sivil sira. Iha ne'ebé serbisu ba asuntu hanesan, husi



insituisaun ka organizasaun diferente, involve ema ne'ebé hanesan, iha suku ne'ebé hanesan iha instituisaun Estadu nian ida deit.

8. Pontu prinsipal ida dadaun ne'e komponente tomak preokupa maka sustentabilidade implementasaun polisiamentu komunitaria iha Timor-Leste wainhira parseiru sira nia tulun ramata. FM fiar katak ida ne'e oportunitade ba Governu Timor-Leste atu kontinua tanba serbisu hirak ne'e lori ona benefisiu ba komunidadade. *Premeiru*, marka ona vizibilidade polisia nia iha komunidadade no involve komunidadade hanesan na'in ba asaun sira siguransa no hatan ho profesionalismu husi PNTL. *Sigundu*, redus número konfliktu no krime iha komunidadade. *Terseiru*, komunidadade sente seguru. Ikus liu, serbisu hirak ne'e hametin relasaun polisia ho komunidadade no hametin konfiansa komunidadade ba polisia. Ho atuasaun sira polisiamentu komunitaria no profesionalismu.

9. Rekomendasaun

Ho ida ne'e FM rekomenda:

- a. Parlamentu Nasional Komisaun B ne'ebé ho nia kna'ar prinsipal ida nu'udar orgaun fiskalizador ba asaun sira Governu nian kontinua fiskaliza implementasaun polisiamentu iha Timor-Leste. Hodi dudu Governu investe iha polisiamentu komunitaria tanba serbisu ida ne'e lori ona benefisiu ba komunidadade.
- b. Governu kontinua dezenvolve no suporta polisiamentu komunitaria iha asaun sira konkretu ne'ebé lori ona konfiansa komunidadade nian ba polisia no komunidadade sai na'in ba asaun sira siguransa.
- c. Governu ho Komnadu Jeral PNTL kontinua apoiu fasilidade, ekipamentu no eleva kapasidade polisiamentu nune'e iha atuasaun sira polisia nian ho profesionalismu.
- d. Ministériu Interior, Ministériu Solidaridade Sosial, PNTL no Sosiedade Sivil presiza integra rekusu siguransa sira iha koordinasaun ida hodi sai forsa siguransa ida ne'ebé ho asaun ne'ebé koordinadu ba sebisu ne'ebé hanesan iha âmbito prevensaun konfliktu, krime no harii paz.
- e. Komandu Jeral PNTL presiza dezenvolve mata-dalan serbisu ba KPK ho nia kadru legal sira hodi hases risku sira ba KPK ho monitorizasaun ida ne'ebé efetivu mos.
- f. Enkoraza públiku no komunidadade sira kontinua partisipa ka involve iha asaun sira siguransa nian no kontinua hametin relasaun sira ne'ebé durante ne'e estabelese ona entre polisia ho komunidadade.



Introdusaun

Krise tinan 2006 kria efeitu ne'ebé boot iha Polísia Nasionál Timor-Leste nian (PNTL), no númeru boot husi efetivu haketak-an no abandona sira nia postu. Ita bele haree katak modelu polísia ne'ebé iha hafoin harii PNTL la tuir realidade Timor nian no presiza halo revizaun kle'an ida ba nia lei organika hodi fó kapasidade operacional boot liu ba polísia, no kadeia de komandu ne'ebé efisiente iha ierarkia ne'ebé iha difinisaun klaru nia laran.¹

Mantein nafatin prinsipi sira kona-bá polísia komunitáriu iha filizofia polisiamentu nian, ne'ebé iha privilijiu atu halo patrullamentu tuir proximidade, agora buka mos katak PNTL hetan karater ida ne'ebé forte liu kona-bá organizaun, disiplina, instrusaun no estatutu pesoál nian, no iha área hirak ne'e iha natureza ne'ebé hanesan ho militar nian.²

Nune'e polisiamentu komunitaria sai hanesan planu prinsipal iha Planu Estratejiku Dezenvolvimentu Nasionál (PEDN) 2030, Planu Estratejiku Siguransa Interna 2030 no introdus iha politika Governu nian. Nune'e iha tinan 2014 PNTL pasa tiha ona Planu Estratejiku ba tinan haat nian 2014 – 2018 adopta modelu polisiamentu ida bolu ho naran VIP (vizibilidade, involvimentu no profesionalismu).

Ita bele hare katak implementasaun husi dokumentu polítika sira ne'e sei lori nafatin PNTL iha ninia karakteristik rasik no nia fiozofia. Fundasaun Mahein (FM) fiar katak ida ne'e sei akontese wainhira iha investimentu ida ne'ebé adekuadu. Dadaun ne'e Governu, PNTL no parseiru dezenvolvimentu sira serbisu maka'as iha implementasaun polisiamentu komunitaria. Dezenvolve ona obra sira kona-bá pratika polisiamentu komunitaria ho rekursu lokal tuir kultura no pratika tradisional sira ne'ebé eziste iha comunidade. Nune'e involve kamada sosiais tomak husi comunidade. Pratika hirak ne'e dezenvolve tuir pratika modernu sira no dezenvolidu ona iha rai avansadu sira. Parseiru sira mos tulun ona PNTL atu aprende iha rai avansadu sira nia pratika polisiamentu no aplika dadaun tuir natureza no kultura sosiedade Timor-Leste nian.

Obra hirak ne'ebé dezenvolve hahu husi nivel nasional to'o suku. Idak-idak hola nia papel prinsipal ida atu hola medida no asaun sira atu hakbesik polisia ba comunidade no involve comunidade iha asaun sira siguransa nian. Ida ne'e polisia sira reklama katak asaun sira siguransa comunidade tenki involve no sai na'in. Maske nune'e, sei iha difikuldade lubuk ida iha pratika ka implementasaun polisiamentu komunitaria iha Timor-Leste.

Relatoriu nia fokus iha seksaun dahuluk kona-bá planu nasional ba polisiamentu komunitariu. Seksaun seluk husi relatoriu ne'e kona-bá polisiamentu PNTL nian no pratika sira kona-bá polisiamentu komunitaria no kestaun seluk liga ho implementasaun no nia sustentabilidade.

¹ Dekretu - Lei Nú. 09/2009, Loron 18 fulan Fevereiru. LEI ORGANIKA POLÍCIA NASIONÁL TIMOR-LESTE (PNTL).

² Hanesan deskreve footnote 1.



Metodolojia

Depoizde halo revizaun ba literatura ka relatoriu sira ne'ebé pública dahuluk tiha ona. Liu-liu dokumentu oficial sira hensan lei, planu estratejiku, política Governu nian no relatoriu relevante sira. Peskiza ida ne'e hala'o mos konsulta no enkontru ho entidade prinsipal sira iha nível nasional, munisipiu ho entidade sira Governu lokal, PNTL, parseiru sira, líder komunitaria no membru Konsellu Polisiamentu Komunitariu (KPK) iha Aileu, Bobonaro, Covalima, Manatuto no Oe-cusse.

Atividade prinsipal ida husi programa Fundasaun Mahein (FM) nian hodi realiza enkontru komunitaria ho naran *Community Management Meeting* (CMM). CMM iha Aileu, Covalima no Ou-cusse hala'o tinan 2014, Bobonaro no Manatuto hala'o iha tinan 2015. CMM nu'udar programa prinsipal ida atu hatene lala'ok siguransa iha Munisipiu sira. Pontu prinsipal seluk atu hatene mos kona-bá implementasaun polisiamentu komunitaria iha munisipiu refere. Liu-liu kona-bá kolokasaun Oficial Polisia Suku (OPS) iha suku ho nia kondisaun inkuli funsionamentu Konselu Polisiamentu Komunitaria (KPK) no Siguransa Voluntariu (SV) iha suku.

CMM iha Munisipiu Aileu, Bobonaro, Covalima, Manatuto no Rejiaun Oe-cusse partisipante sira mai husi Administrador Munisipiu nu'udar mos Prezidenti Konsellu Diretiva Distrital ka Munisipiu (KDD/M), Komandante PNTL Munisipal, Administrador Postu Administrativu sira, Komandante PNTL Eskuadra sira, Xefe Suku sira no membru Konsellu Suku husi suku 10 ne'ebé implementa ona KPK, membru KPK no OPS sira.

Munisipiu Aileu, Bobonaro no Manatuto nu'udar Munisipiu dahuluk ne'ebé estabeselese ona KDD no KPK iha suku 10. Nune'e Munisipiu Covalima durante konsulta no enkontru ne'e la'o, sei iha hela faze sosializasaun kona-bá estabeselementu KDD no KPK. Rejiaun Oe-cusse seidauk estabeselese KDD no KPK, no OPS koloka ona ba suku sira.

Depois ramata CMM, diskusaun ba informasaun sira ne'ebé halibur kontinua ho oficial superior PNTL nian iha nível nasional. Liu-liu Departamentu Polisia Komunitaria Nasional no parseiru implementador programa sira husi *The Asia Foundation* (TAF) liu husi programa *Hametin Kooperasaun Polisia ho Komunidade* (HAKOHAK) no Polisia Nova Zelandia liu husi nia programa *Timor-Leste Community Policing Programme* (TLCPP).

Nune'e hodi konklui relatóriu ida ne'e liu husi metodu ne'ebé FM adopta maka *Security Sector Discussion* (SSD) iha ne'ebé involve peskizador sira husi FM rasik.

Planu Nasional ba Polisiamentu Komunitariu

Asuntu polisiamentu komunitaria konsidera hanesan serbisu prinsipal ida iha dezvoltimentu nasional Timor-Leste nian. Nune'e planu dezvoltimentu polisiamentu komunitariu pasa tiha ona iha Planu Estratejiku Dezvoltimentu Nasional (PEDN) 2011 - 2030. Iha ne'ebé hetan lidun importante ida, Estadu sei promove



polisiamentu komunitaria hanesan aspetu fundamental ida iha formasaun polisia, orienta ba comunidade no jestaun foti desizaun operasional sira hodi aseguara PNTL nia dezempeñu no nia papel polisiamentu komunitaria.

Iha dokumentu PEDN 2011 – 2030 esplika katak:

*“Será promovido o policiamento comunitário que constituirá um aspecto fundamental da formação inicial e desenvolvimento profissional da polícia. Um modelo de policiamento orientado para a comunidade será adoptado para todos os polícias, como filosofia - da PNTL. Este modelo irá informar e orientar a gestão e conseqüentemente a tomada de decisões operacionais e assegurar que a PNTL desempenha o seu papel no policiamento comunitário”.*³

Tradusaun la ofisial...”

Sei promove polisiamentu komunitariu hanesan aspetu fundamental ida iha formasaun inisial no dezenvolvimentu profesional polisia. Modelu polisiamentu ne'ebé orienta ba comunidade, sei adopta ba polisia hotu-hotu hanesan filozofia PNTL nian. Modelu ida ne'e sei informa no orienta jestaun no hodi foti desizaun operasional no aseguara PNTL nian dezempeñu iha sira nia papel polisiamentu komunitariu.

Husi PEDN 2011 – 2030, Governu hamosu Planu Estratejiku Siguransa Interna 2030, polisiamentu komunitari hanesan pilar importante ida iha faze premeiru ka faze hametin no konsolida baze 2011 – 2015. Iha ne'ebé konsidera katak hametin no konsolida polisiamentu komunitariu maka molok faze premeiru ramata. Nune'e Governu sei halo revizaun ba konseitu polisiamentu komunitariu bazeia ba kuadru legal ne'ebé estabesele ona no integra konseitu ne'e ba iha kurikulu formasaun PNTL nian. Nomos, dezenvolve modelu polisiamentu ho orientasaun komunitaria no adopta modelu ne'e hanesan filozofia unika ba PNTL.⁴

Nune'e, VI Governu Konstituisional nia mandatu 2015 – 2017 introdus pilar importante ida hodi kontinua enkoraza modelu polisiamentu komunitariu no mantein estabilidade no siguransa públika nu'udar responsabilidade fundamentais PNTL nian.

*“Neste sentido, e ao longo dos próximos dois anos e meio, continuaremos a desenvolver esforços de forma a aperfeiçoar a capacidade operacional efectiva na prevenção e investigação do crime, na consolidação da segurança pública e do controlo fronteiriço. Continuaremos igualmente a encorajar o modelo de policiamento comunitário e manteremos a estabilidade e a segurança pública como responsabilidades fundamentais da Polícia Nacional de Timor-Leste”.*⁵

Tradusaun la ofisila...”

³ Planu Estratejiku Dezenvolvimentu Nasional (PEDN) 2011 – 2030. P198.

⁴ Planu Estratejiku Siguransa Interna 2030.

⁵ Politika VI Governu Konstituisional ba seitor siguransa 2015 – 2017. P71



Iha tinan rua ho-balu oin mai, sei kontinua dezenvolve kapasidade operacional ne'ebé efektivu iha prevensaun no investigasaun krime, konsolidade siguransa públika no kontrolu frontieristiku. Governu mos sei kontinua enkoraja modelu polisiamentu komunitariu no mantein estabilidade no siguransa públika nu'udar responsabilidade fundamentais PNTL.

FM fiar katak polítika ida ne'e sei implementa ho diak wainhira fokus iha serbisu importante sira hanesan instituisaun ne'e rasik, rekursu ne'ebé suporta serbisu no asaun sira ne'ebé implementa ona iha terenu. Ho nune'e bele atinji mehi sira ne'ebé dezeña ona iha dokumentu polítika ne'e no produs polisia ida ne'ebé profesional.

Departamentu Polisia Komunitaria Nasional

1. Istoría Polisiamentu Komunitaria iha Timor-Leste

Polisia Nasionál Timor-Leste (PNTL) moris iha loron 27 fulan Marsu tinan 2000, hahu kedan husi ne'eba instituisaun PNTL nia ejistensia ho naran ETPS – *East Timor Police Services* liu tiha tihan ida naran ida ne'e muda fali ba TLPS – *Timor-Leste Police Services*. Naran PNTL hahu moris ho Dekretu Lei Nú. 08/2004 hanesan Lei Organika PNTL ba dahuluk, no tuir fali halo revizaun ba Lei Organika Polisia Nasionál Timor-Leste no hamosu dekretu Lei Nú. 09/2009 hanesan Lei Organika PNTL ba daruak. Lei organika ida ne'e mosu hafoin krize tinan 2006, ne'ebé maka fo impaktu maka'as ba dezenvolvimentu polisiamentu Timor-Leste.⁶

PNTL ka naran seluk ne'ebé iha antes PNTL mosu, hahu kedan ona nia atividades ba Polisiamentu Komunitária ne'ebé altura ne'eba ho naran *Community Policing Units* (CPU) iha UNTAET nian tempu kedan. Husi tinan 2000, ne'ebé maka lidera uluk liu husi UNPOL hodi ajuda membru PNTL sira, istoria mosu *Community Policing* hahu iha Komandu Distrital Dili.⁷ Iha momentu ne'eba Dili infrenta problema barak hahu husi problema sosial ka comunidade nian to'o problema krime sira ne'ebé maka kompleksu tebes. Iniativa ida hahu hamosu *Community Policing* iha altura ne'eba maka oinsa atu konvense comunidade sira ne'ebé maka fa'an sasan iha Merkadu Lama (agora Centro Convencões Dili - CCD), hetan kritika barak husi comunidade tanba TLPS momentu ne'eba uza liu forsa hodi duni ema sai husi Merkadu Lama la halo komunikasaun ida ne'ebé diak.⁸

Akompañia ho matenek ema nian no evolusaun husi tempu ba tempu, ema barak komesa komprende dadaun konseitu Estadu direitu demokratiku. Estadu Timor-Leste hahu halo lei oan sira hanesan eijjensia ida, tenki iha nia lei oan sira rasik oinsa bele

⁶ Departamentu Polisia Komunitária nia moris. Disponivel iha <http://www.pntl.tl/polisia-komunitaria/>. Asesu iha loron 1 fulan Fevereiru tinan 2015.

⁷ Atual Komandu Munisipiu Dili.

⁸ Hanesan deskreve iha Footnote 6.



regulariza iha ninia estrutura hodi defini postura instituisaun nian. Maka Dekretu Lei Nú. 08/2004 defini mos Polísia Komunitária hanesan unidade ida hodi hola mos parte hanesan estrutura ida iha PNTL. Ho naran Unidade Polísiamentu Komunitária Nasionál – UPKN bazeia ba Dekretu Lei ida ne'e maka Unidade Polísia Komunitária ne'ebé uluk (antes dekretu Lei Nú. 08/2004) konsentra deit iha Dili hahu espalla iha teritoriu tomak.⁹

Estadu Timor-Leste iha nia Polítiku rasik oinsa atu bele dezenvolve no haforsa nia instituisaun ida ne'ebé forsa no util maka iha tinan 2009 hahu halo revizaun hodi hamosu Dekretu Lei Nú. 09/2009 hanesan Lei Organika PNTL ba daruak, no muda naran Unidade Polísia Komunitária Nasionál – UPKN ba fali Departamentu Polísia Komunitária Nasionál – DPKN ho nia misaun no hamosu estratejia oin-oin atu bele manan fiar no konfiasa comunidade nian hodi kria parseiria ne'ebé metin.¹⁰

2. Departamentu Polisia Komunitaria

a. Kna'ar Departamentu Polisa Komunitaria

Tuir Dekretu - Lei Nú. 09/2009, Loron 18 fulan Feveireiru, Lei Organika Polísia Nasional Timor-Leste (PNTL) artigu 18 ORGANIKA POLÍSIA NASIONÁL TIMOR-LESTE (PNTL). Artigu 18 Departamentu Polísiamentu Komunitária maka departamentu ida iha Komandu Nasionál Operasaun nia okos ho nia misaun espesifika hanesan tuir mai:

- a) *Tuir kolaborasun ho Sentru Formasaun Polísia nian defini nesesidades no programa instrusaun ba serbisu especialidade polísiamentu Komunitária nian.*
- b) *Elabora estudu pareser ba programa no aktividade sira ne'ebé Komandu Distrital sira atu dezenvolve hamutuk ho populasoun.*
- c) *Halo públicidade kona-ba kna'ar no misaun PNTL nian iha comunidade nia le'et.*
- d) *Fó apoiu ba Komandu Distrital hodi estabelese relasaun ho estrutura sira iha comunidade nian laran.*
- e) *Hala'o tarefa seluk ne'ebé monu iha âmbito misaun nian nia laran.¹¹*

Kna'ar Departamentu Polísiamentu Komunitária Nasionál nian (DPKN) maka atu fó edukasun no hasa'e kuiñesementu tantu ba polisia comunidade kona-ba ideia no konseitu prevensaun krimi no siguransa comunidade nomos fó meu hodi hato'o mensajen ne'ebé uniforme ba Nasaun laran tomak iha prosesu ne'ebé koordenadu liu husi estrutura unidade protesaun comunidade nasional nian.

Fornese edukasun no formasaun ba PNTL no comunidade kona-bá kna'ar polisia nian, lei no orden iha comunidade leet. Fornese koordenasaun no serbisu hamutuk ho seksaun internu PNTL nian, Departamentu sira Governu nian, ajénsia internasionál sira,

⁹ Hanesan deskreve iha Footnote 6.

¹⁰ Hanesan deskreve iha Footnote 6.

¹¹ Dekretu - Lei Nú. 09/2009, Loron 18 fulan Feveireiru. LEI ORGANIKA POLÍSIA NASIONÁL TIMOR-LESTE (PNTL). Artigu 18.



ONG sira, no Igreja hodi garante aproximasaun multilaterál ida ba prevensaun krime.¹²

b. Saida maka Departamentu Polisia Komunitaria halo ona?

Tuir kompetensia ne'ebé atribui ba departamentu ida ne'e nian, dezenvolve ona serbisu prinsipal ida hodi konkretiza filozofia polisiamentu nian tuir artigu 18 Lei Organika PNTL nian.

a) *Dezenvolve modelu polisiamentu komunitaria*

Departamentu Polisia Komunitaria dezenvolve ona dokumentu prinsipal ida bolu naran "Modelu Polisiamentu Komunitaria". Modelu polisiamentu komunitaria ho naran *Vizibilidade, Involvimentu no Profesionalismu – VIP*. Ho nia lema "*hamutuk ita prevene no kombate krime iha Timor-Leste*".¹³

Modelu ida ne'e atu promove PNTL nia estratéjia sira ba prevensaun krime no protesau komunitaria iha Timor-Leste nia laran. Nune'e kna'ar PNTL nian hodi prevene krime no fo siguransa sei hala'o liu husi aproximasaun parseria ida ho sidadaun Timor-Leste tomak.¹⁴

Modelu ne'e identifika ona modelu polisiamentu komunitaria ne'ebé banati tuir polisiamentu modernu no polisiamentu demokratiku, atividade estratejiku no atividade prioridade hirak ne'ebé maka kontribui ona modelu komum konseitu polisiamentu komunitaria Timor-Leste nian ne'ebé hanesan polisiamentu VIP.¹⁵

Polisiamentu VIP promove ona iha entidade barak-barak nia oin liu husi reuniaun, sosializasaun no kampañia ba prevensaun krime, ninia implementasaun justifika husi ninia existencia ba atividade estratejiku ne'ebé maka implementa iha Komandu Munisipiu 12 no Rejiaun Oe-cusse. Nune'e PNTL reklama katak dokumentu modelu polisiamentu komunitaria sai hanesan mestri no disionariu boot ba implementasaun polisiamentu komunitaria iha Timor-Leste, tuir idade no otas husi instituisaun ne'e rasik no nia evolusaun.¹⁶

b) *Dezenvolve mata-dalan treinamentu*

Serbisu prinsipal seluk Departamentu Polisia Komunitaria dezenvolve ona "mata-dalan treinamentu matéria polisiamentu komunitaria Timor-Leste". Mata-dalan

¹² Funsau polisiamentu komunitaria. Disponivel iha <http://www.pntl.tl/polisia-komunitaria/>. Asesu iha loran 1 fulan Feveiru tinan 2015.

¹³ PNTL - Departamentu Polisia Komunitaria Nasional. Modelu Polisiamentu Komunitaria. Tinan 2015.

¹⁴ Hanesan deskreve iha footnote 13.

¹⁵ Hanesan deskreve iha footnote 13.

¹⁶ Hanesan deskreve iha footnote 13.



nia intensaun atu fasilita treinamentu ka formasaun ba membru sira kona-bá polisiamentu komunitaria no fasilita membru polisia sira ne'ebé koloka iha suku hatene sira nia kna'ar no fasilita sira nia interaksaun entre polisia ho comunidade.¹⁷

Mata-dalan ne'e atu uniformiza intendementu ka kompriensaun no vizaun husi instituisaun PNTL kona-bá programa no atividade polisiamentu komunitaria. Liu-liu kriasaun serbisu polisia suku hodi hatudu sira nia prezensa iha área rurais no transmite informasaun ba no mai husi comunidade.¹⁸

Mata-dalan ne'e mos sai hanesan orientasaun ka diresaun ida husi Komandu Jeral PNTL ba Komandu Minisipiu sira oinsa atu prepara kolokasaun, edukasaun no monitorizasaun ba membru polisia sira ne'ebé koloka iha postu polisia suku.¹⁹

c) *Dezenvolve mata-dalan Postu Polisia Suku (PPS)*

Intensaun husi mata-dalan ida ne'e atu fasilita membru sira ne'ebé koloka iha suku hodi hatene sira nia kna'ar hodi mos fasilita interaksaun entre polisia ho comunidade. Ho nia kna'ar prinsipal:²⁰

- *Fo konsellu ba comunidade oinsa atu kria kondisaun ida ne'ebe bele fo vantajem atu garante situasaun trunkilu ba iha bairru laran.*
- *Halao patrullamentu iha area ne'ebé fo responsavel bá.*
- *Dezenvolve programa vizita uma ba uma.*
- *Hala'o enkontru ho lideransa komunitária inklui mos comunidade em jeral.*
- *Hala'o programa vizita ba iha eskola sira.*
- *Kria limpeza jeral iha bairu laran.*
- *Halo patrullamentu la'o ain iha bairu sira.*

PPS nia misaun ka kna'ar prinsipal ida mos atu:²¹

- *Fo konsellu ba comunidade kona-bá pozisaun, kna'ar, responsabilidade no funsaun PNTL ba iha comunidade. Direitu no dever comunidade atu respeito ba lei no ordem. Lei sira ne'ebé relevantes ka lei aplikaveis.*
- *Fo konsellu ba comunidade atu hasa'e konsensia no garante paz no hakmatek iha suku laran kona-bá problema siguransa no paz ba iha comunidade. Kauza husi situasan ne'ebé la seguru comunidade. Metodu prevensaun krime. Maneira implementasaun seguransa bairu ka vijilansia komunitária iha suku-suku mos iha aldeia sira.*
- *Misaun ka kna'ar polisiamentu ne'ebé justu tuir situasaun no kondisaun iha suku*

¹⁷ PNTL – Departamentu Polisia Komunitaria Nasional. “Mata-dalan” treinamentu materia polisiamentu komunitaria Timor-Leste. tinan 2015.

¹⁸ Hanesan deskreve iha footnote 17.

¹⁹ Hanesan deskreve iha footnote 17.

²⁰ PNTL – Departamentu Polisia Komunitaria Nasional. Mata-dalan Postu Polisi Suku (PPS). Tinan 2015.

²¹ Hanesan deskreve iha footnote 20.



ne'ebé nia hala'o kna'er ba. Halibur informasaun kona-bá siguransa husi comunidade. Garante ka halo siguransa ba atividade sira comunidade nian (Atividades regular, relijiaun, kultura, nsst). Simu keixa ka relatoriu husi comunidade. Fo ajuda ba eskoltu, buka tuir sasan lakon ka ema lakon, no responde ba pedidu comunidade nian kona-bá serbisu polisia. Hala'o funsaun hanesan trázitu no siguransa rodoviaria iha dalan. Hala'o programa polisia vizita eskola. Hala'o programa vizita uma ba uma. Atendementu inísiu ba kazu krime, violasaun, ka asidente iha fatin akontesementu. Hala'o kna'ar iha asuntu dezentvolvimentu no atividade sira komunitária bazeia ba pedidu husi instituisaun seluk ne'ebé responsabiliza iha comunidade laran.

- *Hanesan mos edukador, pretezedor, servidor, no transmite informasaun.*

d) *Mata-dalan Siguransa Voluntariu Suku*

Siguransa Suku katak siguransa ida ne'ebé maka mai husi kontribuisaun comunidade ne'ebé maka hetan kuiñesimentu husi polísia.²² Mata-dalan ne'e difine misaun prinsipal ida hodi orienta Siguransa Voluntariu Suku maka:

- *Hamosu parséria ida ne'ebé mutúa entre polisia ho comunidade.*
- *Komunidade sente nain duni ba sira nia suku rasik.*
- *Komunidade na'in ba atividade sira polísiamentu.*
- *Hamosu sensibilidade husi comunidade rasik iha natureza siguransa komunitária.*
- *Harii valor respeita ne'ebé as husi parte ida-idak hanesan Nasaun Demokratiku.*

Matadalan ne'e mos difine kona-bá Siguransa Voluntariu Suku nia funsionamentu, estratéjia, oinsa atu estabelese no nia atividade.²³

e) *Formasaun no estudu komparativu*

To'o inisiu tinan 2015 Departamentu Polísia Komunitária Nasionál realiza treinamentu Ofisiál Polísia Suku (OPS) hamutuk na'in 442 (atus hat hatnulu resin rua) husi munisipiu 12 no rejiaun Oe-cusse tuir treinamentu avansadu kona-bá kna'ar OPS hodi vizita tama uma sai uma hodi sosializa lei violénsia doméstika, kuiñesimentu kona-bá droga, alkóliku nomos oinsa halo investigasaun báziku ba problema ruma ne'ebé akontese iha terrenu. Treinamentu ne'e nu'udar kooperasaun ho Polísia Nova Zelandia liu husi *Timor-Leste Community Police Programme* (TLCPP), Fundasaun Ázia liu husi Programa HAKOHAK no ONG PRADET.²⁴

Treinamentu ne'e hala'o durante fulan haat (4) nia laran, hahú husi loron 09 Setembru 2014 to'o fulan Janeiru 2015. Husi total OPS 442 kada semana partisipante hamutuk na'in 40 (hatnulu) husi munisipiu 3 (tolu) maka partisipa. Re-treinamentu ne'e hala'o bazeia ba rezultadu *post test* husi treinamentu báziku

²² PNTL – Departamentu Polisia Komunitaria Nasional. Mata-dalan Siguransa Voluntariu Suku. Tinan 2015.

²³ Hanesan deskreve iha footnote 22.

²⁴ PNTL. Disponivel iha: <http://www.pntl.tl/2014/09/15/memburu-ops-442-tuir-treinamentu-avansadu/>. Asesu iha loron 30 fulan Juñu tinan 2015.



ne'ebe hala'o iha 2013 ho objetivu treinamentu ne'e maka atu eleva kapasidade OPS, nune'e bele hetan ona kualidade OPS, nu'udar ajente ne'ebé primeira liña iha sistema operasaun políisial nian.²⁵

Husi formasaun sira iha rai laran, hala'o mos formasaun seluk iha rai liur liu husi estudu komparativu iha rai liur. To'o tinan 2014, membru OPS na'in 30 hala'o estudu komparativu iha Bekasi – Indonezia. Depois loron neen iha Bekasi, ekipa aranka mai Bali ba programa kuiñesementu polísia turizmu. Programa kapasitasaun ba membru OPS sira ne'e tamba hetan kooperasaun entre PNTL ho Polísia Nasionál Japaun nian, liu husi ajénsia *Japaun Internasionál Cooperation Agency* (JICA) iha Timor-Leste. Hasa'e kapasitasaun ne'e atu kumpri programa kooperasaun entre PNTL ho POLRI, iha área dezenvolvimentu polísia Timor-Leste.²⁶

Iha tinan 2012 polisia komunitaria na'in lima hala'o estudu komparativu iha Ichikawa Perfektore- Japaun, kona-bá OPS nian. Membru polisia komunitaria na'in lima ne'e kompostu husi Komandante Polisia Komunitaria Munisipiu Viqueque, Xefe Polisia Komunitaria Munisipiu Lautem, Xefe Polisia Komunitaria Munisipiu Bobonaro, Membru Polisia Komunitaria Nasional, no Adjuntu Xefe Polisia Komunitaria Nasional.²⁷

Polisia komunitaria hala'o mos estudu komparativu iha Nova Zelandia desde tinan 2013 to'o tinan 2014. Estudu komparativu ne'e nu'udar kooperasan entre Governu Timor-Leste ho Nova Zelandia liu husi Programa TLCPP ne'ebé hare liu ba dezenvolvimentu polisia komunitaria Timor Leste. Estudu komparativu ne'e aprende kona-bá sistema polisiamentu Nova Zelandia, Monitorizasaun no Evaluasaun, treinamentu ba media, kodigu konduta, inteljiensia, responde comunidade Maori, planu dezenvolvimentu rekursu umanu, planu estrajejiku polisiamentu, informasaun no teknolojia no programa polisia pasifiku ba violensia domestika.²⁸

Departamentu Polisia Komunitaria Nasiona tuir nia misaun ne'ebé delega ba nian, to'o Maiu tinan 2015 koloka ona OPS ba suku 410, OPE iha eskola 12 iha munisipiu Dili. Nune'e mos serbisu hamutuk ho parseiru dezenvolvimentu sira estabesele ona KDD iha munisipiu 11, KPK iha suku 110 no Siguransa Voluntariu iha suku husi Munisipiu

²⁵ Hanesan deskreve iha footnote 24.

²⁶ PNTL. Disponivel iha: <http://www.pntl.tl/2014/11/14/membru-ops-30-hasa-e-koineselementu-iha-indonezia/>. Asesu iha loron 30 fulan Juñu tinan 2015.

²⁷ Media The Dili Weekly. Disponivel iha: <http://www.thediliweekly.com/45-notisia/news/1854-five-community-police-officers-on-an-exchange-program-in-japan>. Asesu iha loron 20 fulan Juñu tinan 2015.

²⁸ PNTL – Departamentu Polisia Komunitaria Nasional. Relatoriu Estudu Komparativu iha Nova Zelandia tinan 2013 no 2014 nian.



Viqueque no Ermera.²⁹

Polisiamentu Komunitaria

Polisiamentu Komunitariu nu'udar filozofia PNTL nian no hatur ona iha iha Dekretu - Lei Nú. 09/2009, Loron 18 fulan Feveireiru, Lei Organika Polisia Nasional Timor-Leste (PNTL) artigu 1, númeru 2, hatete tuir estratéjia no filozofia polisiamentu nian PNTL iha karakterístika polisia komunitária, maski nia organizasaun, dixiplina, instrusaun no estatutu pesoál nian sei tuir natureza militar, PNTL sei la konstitui forsa natureza militar ida.³⁰

Nune'e iha tinan 2014 PNTL pasa ona Planu Estratejiku 2014 – 2018 ho nia modelu polisiamentu hakoak filozofia polisiamentu komunitariu, liu husi adopta doutrina VIP – Vizibilidade, Involvementu no Profesionalismu.

- o **Vizibilidade** – vizibilidade aas polisia nia halo comunidade sente seguru.
- o **Involvementu** – involvement comunidade nia halo comunidade sente hola parte.
- o **Profesionalismu** – hatan ho profesionalismu hodi nune'e servisu polisia nian satisfas comunidade.³¹

Vizibilidades, hatudu presenza polisia nian liu husi atividades polisial iha comunidade nia leet iha fatin hotu-hotu, hodi nune'e comunidade sente seguru no hakmatek. *Involvementu*, involvementu comunidade nian iha lala'ok siguransa hodi nune'e eduka ona comunidade sai mos na'in ba asaun sira siguransa. Nune'e siguransa la'os responsabilidade PNTL nian deit, maibe responsabilidade ema hotu-hotu nian hodi asegura espirtu parseriadu ne'ebe forte liutan. *Profesionalismu*, hatudu matenek iha ita nia atuasaun no atendentu, nakonu ho disiplina hatene lori-an no tau-an iha comunidade nia leet. Nomós respeita hirarkia Komandu nian, hodi asegura integridade, kredibilidade no prestiju instituisaun PNTL.³²

Siginifika filozofia polisiamentu komunitaria aplika ba membru PNTL hotu-hotu. Polisiamentu komunitaria la refere deit ba departamentu ka seksaun espesifiku ida iha PNTL nia laran maibe refere ba aproximasaun entre PNTL ho comunidade. Maske nune'e sei iha interpretasaun diferente husi membru PNTL sira katak polisiamentu komunitariu hala'o deit husi pesoal sira ne'ebé koloka iha Departamentu Polisia Komunitaria Nasional no iha munisipiu sira.³³

²⁹ PNTL – Departamentu Polisia Komunitaria Nasional. Tinan 2015.

³⁰ Dekretu - Lei Nú. 09/2009, Loron 18 fulan Feveireiru. LEI ORGANIKA POLÍZIA NASIONÁL TIMOR-LESTE (PNTL). Artigu 1, númeru 2.

³¹ Planu Estratejiku Polisia Nasional Timor-Leste (PNTL) 2014 -2018.

³² Planu Estratejiku PNTL tinan 2014 – 2018.


³³ Interpretasaun ne'e hato'o husi Xefe Departamentu Polisia Komunitaria Nasional (DPKN) Superintendente Asistente Polisia Boavida Ribeiro iha Enkontru Komitiva Jestaun Programa ba Polisiamentu Komunitaria ho parseiru dezenvolvimentu sira iha Kuartel Jeral PNTL, Dili. Loron 11 fulan Maiu tinan 2015.



Husi interpretasaun ne'e, konfirmasaun ne'ebé FM halo ho membru PNTL balu ne'ebé koloka iha unidade, departamentu, serbisu no seksaun seluk iha PNTL nia laran. Iha membru balu hato'o interpretasaun hanesan katak polisiamentu komunitaria hala'o husi departamentu responsavel.

FM hakfodak oituan ho situasaun ida ne'e. Portantu Lei Organika PNTL nian pasa tiha ona iha tinan neen liu ba maibe membru PNTL sira seidauk kompriende diak kona-bá lei ne'e rasik. Partikularmente polisiamentu komunitaria nu'udar filazofia PNTL nian. Nune'e mos Planu Estratejiku PNTL 2014 – 2018 pasa iha tinan ida liu ba, iha ne'ebé dezeńa modelu polisiamentu hakoak filozofia polisiamentu komunitaria, liu husi adopta doutrina VIP – Vizibilidade, Involvementu no Profesionalismu.

FM fiar katak Lei no Planu Estratejiku PNTL ne'e rasik la ho sosializasaun ne'ebé diak ba membru PNTL sira iha unidade, departamentu, serbisu no seksaun seluk. Tanba ne'e aproximasaun sira husi membru PNTL durante ne'e kestiona husi públiku no rezulta pratika sira la ho aproximasaun polisiamentu komunitariu. Relatoriu Provedoria Direitus Humanus no Justisa (PDHJ) tinan 2014 relata violasaun direitus umanus husi membru PNTL kontinua aumenta.³⁴



Fontes: Departamentu Polisia Komunitaria Nasional, tinan 2015.

³⁴ Relatoriu Provedoria Direitus Umanus no Justisa (PDHJ) tinan 2014.



1. Nível Política no Estratejiku

a. *Konsellu Dirativa Nasional (KDN)*

Kompozisaun husi KDN mai husi membru Governu ne'ebé responsável ba área siguransa hamutuk Komandante Jeral PNTL sai hanesan lideransa ba iha KDN. Konsellu ida ne'e nia funsaun maka atu orienta politikamente kona-bá implementasaun karater polisiamentu komunitaria ho nia programa sira ne'ebé implementa iha iha teritoriu tomak.³⁵

KDN halo reuniaun dala ida ka rua kada tinan hodi halo avaliasaun ba progresu sira implementasaun política polisiamentu komunitaria tuir Planu Estratejiku PNTL nian.³⁶

b. *Konsellu Jestaun ba Programa (KJP)*

Kompozisaun KJP nian mai husi Xefe Departamentu Polisia Komunitaria Nasional hamutuk ho parseiru dezenvolvimentu sira. Konsellu nia tarefas atribui ba maka hanesan tuir mai ne'e:

- *Simu relatóriu husi Komandante Munisipiu sira kona-bá implementasaun programa.*
- *Rona no hatan ba problema ne'ebé maka identifika husi Komandante Munisipiu sira durante implementasaun programa.*
- *KJP hala'o nia reuniaun periodikamente kada trimestral.*
- *KJP halo mos rekomendasaun ba KDN karik iha asuntu ne'ebé maka KJP labele foti desizaun.*
- *KJP lidera husi Segundu Komandante Jeral PNTL no bele delega ba Komandante Operasaun PNTL.³⁷*

c. *Konsellu Dirativa Distrital ka Munisipiu (KDD/M)*

Kompozisaun KDD mai husi Komandante Munisipiu, Administrador Munisipiu, Departamentu Interligadus ne'ebé kompostu iha área administrativu munisipiu nian. KDD/M nia nia tarefa maka hanesan tuir mai ne'e:

- *Monitoriza implementasaun atividade sira estratejiku polisiamentu komunitaria Timor-Leste iha Komandu Munisipiu idak-idak.*
- *Simu proposta no halo prosesu ba proposta hirak ne'ebé maka haruka husi Komandante Eskuadra no Administrador Postu Administrativu sira kona-bá implementasaun KPK no atividade OPS, liu-liu kona-bá problema hirak ne'ebé maka comunidade sira hasoru.*

³⁵ PNTL – Departamentu Polisia Komunitaria Nasional. Modelu Poliasmentu Komunitaria. Tinan 2015.

³⁶ Hanesan deskreve iha footnote 35.

³⁷ Hanesan deskreve iha footnote 35.



- *Halo reuniaun dala ida iha fulan tolu hala'o evaluasaun ba programa iha nível munisipiu idak-idak.*
- *Diside suku ne'ebé sai hanesan prioridade atu implementa KPK maibe la'os difine suku atu koloka OPS.³⁸*

2. Implementador Atividade Estratejiku

PNTL hamutuk ho parseiru dezenvolvimentu sira dezenvolve dadauk ona conseitu polisiamentu ne'ebé orientadu ba comunidade iha objetivu hakarak hadi'a polisia nia dezenpeñu no harii públiku nia fiar liu husi haburas parseria kolaborativu entre comunidade ho polisia ne'ebé uza aprosimasaun rezolve problema hodi responde ba comunidade lokál sira nia nesesidade siguransa no espetativa sira.³⁹

Nune'e pratika polisiamentu komunitariu husi tipu oin-oin ne'ebé pesoal polisia aprende husi estudu komparativu iha Nasaun seluk. Ho referensia Nasaun seluk ne'e tulun nia ikus mai dezeña rasik modelu Polisiamentu Komunitariu ida ne'ebé bele aplika tuir natureza siguransa iha Timor-Leste. Pratika Polisiamentu Komunitariu ne'ebé involve grupu oin-oin iha comunidade nia leet.⁴⁰

Pratika polisiamentu komunitariu ne'ebé hala'o harii konfiansa ida maka'as husi comunidade ba polisia. Relatóriu *The Asia Foundation* (TAF) iha tinan 2013 hato'o katak konfiansa comunidade nian ba polisia komesa maka'as nu'udar kauza vizibilidade polisia iha comunidade no involve comunidade iha asaun sira siguransa nian.⁴¹

Portantu iha períodu sira liu ba, ejijensia prinsipal ida husi comunidade kona-bá prezensa polisia iha sira nia leet. Ejijensia ida ne'e hetan atensaun maka'as husi Prezidenti da República wanhira hala'o vizita sira iha suku. Nune'e Premeiru Ministru husu atu koloka Oficial Polisia Suku (OPS) sira iha suku hotu-hotu munisipiu 12 no rejiaun Oe-cusse. Nune'e tuir orientasaun Komandu Jeral PNTL nian ba Komandu Munisipiu sira hodi koloka OPS sira ba suku hotu-hotu iha sira nia munisipiu. Iha ne'ebé tarde to'o tinan klaran 2015, OPS tenki iha ona suku 442.⁴²

³⁸ Hanesan deskreve iha footnote 35.

³⁹ Relatóriu The Asia Foundation (TAF). Disponivel iha: <https://asiafoundation.org/resources/pdfs/TimorLesteCPTETUM.pdf>. Asesu iha loron 25 fulan Juñu tinan 2015.

⁴⁰ Inisiativa Husi Baze Kona-bá Pratika Polisiamentu Komunitaria: Inisiativa Komandu Distrital Bobonaro, Aileu, Liquisa no Unidade Polisia Marítima. Disponivel iha: http://www.fundasaunmahein.org/wp-content/uploads/2013/11/MNH_Nu.05_15112013_Polisia-Komunitariapdf.pdf. Asesu iha loron 24 fulan Outobru tinan 2014

⁴¹ Relatóriu The Asia Foundation (TAF), tinan 2013.

⁴² Diskursu Xefe Departamentu Polisiamentu Komunitaria Nasional, Superintendente Asistente Boavida Ribeiro hato'o iha seminar nasional polisiamentu Komunitaria iha Dili fulan Setembru tinan 2014.



Ho apoiu parseiru dezenvolvimentu sira Komandu Jeral PNTL liu Departamentu Polisia Komunitaria Nasional estabelese rekursu siguransa iha nível suku no aldeia ho nia estrutura sira. Rekursu siguransa ho nia estrutura kompostu husi KPK no SV implementa ona munisipiu 11. KPK no SV nu'udar modelu polisiamentu komunitariu ida ne'ebé involve kamada sosiais hotu husi comunidade.

Tabela 01. Munisipiu ne'ebé estabelese ona KPK, SV no OPS/OPE

Nú.	Munisipiu no Rejiaun/KDD	Grupu Polisiamentu Komunitariu			
		OPS	OPE	KPK	SV
1.	Aileu	31	-	10	-
2.	Ainaro	21	-	12	-
3.	Bobonaro	28	-	10	-
4.	Baucau	49	-	10	-
5.	Covalima	30	-	10	-
6.	Dili	33	12	6	-
7.	Ermera	52	-	10	1
8.	Lautem	34	-	-	-
9.	Liquiça	23	-	12	-
10.	Manatuto	28	-	10	-
11.	Manufahi	29	-	10	-
12.	Viqueque	35	-	10	1
13.	Oecusse	18	-	-	-
Total		410	12	110	2

Fontes: PNTL – Departamentu Polisia Komunitariu Nasional, Maiu 2015.

Tabela iha leten indika kona-bá munisipiu sira ne'ebé estabelese ona KPK, SV, OPS no OPE. Maske nune'e KPK sei estabelese deit iha suku 10 ba munisipiu 11 no munisipiu Lautem no Rejiaun Oe-cusse seidak estabelese.

a. Konsellu Polisiamentu Komunitaria (KPK)

Munisipiu Aileu, Baucau, Bobonaro no Manatuto iha tinan 2012 sai hanesan projetu dahuluk estabelesemente KPK hafoin estende-tan ba munisipiu seluk. To'o tinan 2015 estabelese ona iha suku 10 iha Munisipiu 11 ho total 110 KPK. KPK nia kompozisaun mai husi líder komunitaria no Konsellu Suku sira, representante veteranus sira, líder juventude no OPS rasik.⁴³

Atividade KPK:

- *Identifika problema: halo enkontru fulan-fulan, halo planu asaun ba atividade sira no rezolusaun no prevensaun.*
- *Rezolve problema: ezekuta planu asaun (rezolve problema ho referal ba problema).*
- *Relata relatóriu: avalia impaktu husi asaun sira.*

⁴³ PNTL – Departamentu Polisia Komunitaria Nasional. Modelu Poliasmentu Komunitaria. Tinan 2015.



- *Mekanismu rezolve problema hirak ne'e ne'e utiliza mekanismu PARA (Peskiza, Analiza, Responde no Avaliasaun).*⁴⁴

b. Siguransa Voluntariu (SV)

SV dezenvolve ona husi Komandu Munisipiu Liquica desde tinan 2012 iha Komandante Natercia S. Martins nia komanda. Hanesan relatóriu dahuluk ne'ebé FM hasai iha tinan 2013, SV nia prezensa lori impaktu positivu tebes ba comunidade. SV involve autor oin-oin husi comunidade ho esperitu serbisu voluntairu hodi apoiu ba PNTL iha tempu ne'ebé polisia dook husi comunidade.⁴⁵

SV nu'udar siguransa suku ida ne'ebé maka mai husi kontribuisaun comunidade ne'ebé maka hetan kuiñesementu husi polisia. SV nia kompozisaun mai husi comunidade, grupu juventude no grupu adultu ne'ebé sempre hadomi ba estabilidade. SV nia atividade eduka comunidade sai na'in ba nia suku no oinsa nia bele kontrola nia suku rasik hanesan sidadaun ne'ebé hadomi nia ambiente siguransa.⁴⁶

SV identiku ho siguransa sosial ne'ebé mai husi comunidade tanba sira nia estabilidade ne'ebé ho karakter voluntariu (sei la hetan intensivu ka favor ruma). SV servi nia comunidade ne'ebé sira mos partense ba hanesan família suku ne'e rasik.⁴⁷

SV estabelese iha suku no aldeia, PNTL liu husi Komandante Munisipiu sira maka dezenvolve no hetan formasaun husi Departamentu Polisia Komunitaria Nasional kona-bá formatu hirak ne'ebé bele utiliza ba iha funsionamentu SV. SV hanesan parseiru PNTL nian no la iha autoridade polisial. SV sujeita ba siguransa suku nian maka mai husi liderasan komunitaria sira no konsellu suku tomak, juventude, veterenus, PNTL formadu karik iha.⁴⁸

Estratéjia SV ho PNTL bele responde ho lalais no emiadata ba problema comunidade nian. Transparansia iha atendentu, asegura no proteze, servi comunidade tantu comunidade ne'ebé hela iha área juridiku nomos comunidade ne'ebé halo vizita. SV mos implementa estratéjia polisiamentu komunitaria ba comunidade husi suku to'o aldeia. SV halo mos prevensaun ba terror ka ameasa iha comunidade nia leet.⁴⁹

⁴⁴ Hanesan deskreve iha footnote 43.

⁴⁵ Inisiativa Husi Baze Kona-bá Pratika Polisiamentu Komunitaria: Inisiativa Komandu Distrital Bobonaro, Aileu, Liquisa no Unidade Polisia Marítima. Disponivel iha: http://www.fundasaunmahein.org/wp-content/uploads/2013/11/MNH_Nu.05_15112013_Polisia-Komunitariapdf.pdf. Asesu iha loron 28 fulan Juñu tinan 2015.

⁴⁶ PNTL – Departamentu Polisia Komunitaria Nasional. Modelu Poliasmentu Komunitaria. Tinan 2015.

⁴⁷ Hanesan deskreve iha footnote 46.

⁴⁸ Hanesan deskreve iha footnote 46.

⁴⁹ Hanesan deskreve iha footnote 46.



Dadaun ne'e tuir relatóriu Departamentu Polisia Komunitaria Nasional to'o tinan 2015 SV estabeselese ona iha suku rua husi Munisipiu Ermera no Viqueque. Iha Munisipiu Ermera estabeselese iha suku Poetete no Munisipiu Viqueque estabeselese iha suku Uaguaia.⁵⁰

c. Oficial Polisia Suku (OPS)

OPS hanesan membru PNTL ida ne'ebé maka hetan ona treinamentu husi Departamentu Polisia Komunitaria Nasional kona-bá treinamentu báziku, retreinamentu no treinamentu avansadu, treinamentu espesifiku no sertifika ona ba treinamentu hirak ne'e tuir kolaborasaun Sentru Formasaun PNTL nian. Kriteria sai hanesan OPS minimu diviza Ajente Xefe no masimu Premeiru Sarjentu.⁵¹ Maske iha suku sira tuir FM nia monitorizasaun hare katak maioria ho diviza Ajente no Ajente Prinsipal.

Atividade OPS:

- *Halo vizita husi uma ba uma*
- *Halo reuniaun ho líder komunitaria*
- *Halo edukasaun ba comunidade ba lalaok prevensaun krime.*
- *Halo atendementu ba problema*
- *Vizita grupu vulniravel sira (alizardus no orfonatu)*
- *Reuniaun ho membru KPK*
- *Halo mos vizita ba eskola (ba fatin ne'ebé OPE seidak eziste)*
- *Foti dadus hotu husi suku ninian (jeografiku, demografiku, organizasaun ne'ebé existe iha suku hanesan arte marsiais, organizasaun politiku, líder influensiadu, kondisaun sosial no ekonomiku).⁵²*

To'o tinan 2015 tuir relatóriu Departamentu Polisia Komunitaria Nasional OPS koloka ona suku 410 husi munisipiu 12 no rejaun Oe-cusse. Nune'e tuir orientasaun Komandu Jeral PNTL nian to'o tinan rohan 2015 OPS koloka ona iha suku 442 iha teritoriu tomak.⁵³

d. Oficial Polisia Eskola (OPE)

OPE mai husi membru polisia ne'ebé maka Komandu Munisipiu idak-idak nomeia bazeia nesesidade atendementu ne'ebé konsentradu. OPE mos hetan treinamentu ne'ebé espesifiku kona-bá atividade vizita ba eskola nian no fornese husi Departamentu Polisia Komunitaria Nasioanl tuir kolaborasaun Sentru Formasaun PNTL nian.⁵⁴

⁵⁰ Relatoriu Departamentu Polisia Komunitaria Nasional, tinan 2015.

⁵¹ PNTL – Departamentu Polisia Komunitaria Nasional. Modelu Poliasmentu Komunitaria. Tinan 2015.

⁵² Hanesan deskreve iha footnote 51.

⁵³ Relatoriu Departamentu Polisia Komunitaria Nasional – PNTL, tinan 2015.

⁵⁴ PNTL – Departamentu Polisia Komunitaria Nasional. Modelu Poliasmentu Komunitaria. Tinan 2015.



Atividade OPE:

- *Halo vizita ba eskola sira hodi halo edukasaun ba estudante sira kona-bá prevensaun krime iha área narkotrafiku, prevensaun ba prostituisaun no prevensaun ba violasaun sira ba sinais tranzitu no siguransa rodoviária.*
- *OPE halo mos rejistu kona-bá total estudante sira, total profesor sira no kondisaun siguransa ba eskola ne'e rasik.*
- *Tarefas seluk tuir matadalan OPE nian.*

Dadaun ne'e OPE estabesele ona iha Munisipiu Dili, hanesan munisipiu pilotu ba estabesementu OPE.⁵⁵ Iha munisipiu Dili estabesele ona eskola 12 tuir nesesidade husi eskola ne'e no identifika ona katak eskola hirak ne'e risku ba konfliktu no krime tantu iha ambiente eskola ne'e rasik no mai husi liur.⁵⁶

Dazafiu ba Polisiamentu Komunitariu

1. *Baze legal no mata-dalan ba KPK*

Iha apresentasaun ida husi ekipa konjunta avaliasaun ba programa TLCPP no HAKOHAK nian durante ne'e apoiu ba PNTL partikularmente polisiamentu komunitaria. Ekipa ne'e preokupa kona-bá baze legal ba KPK. Ekipa ne'e iha tauk oituan kona-bá kompetensia sira ne'ebé delega ba KPK. Nune'e iha diskusaun ne'e la'o partisipante sira mos kestiona KPK nia atuasaun ida ne'ebé mak KPK bele atua no ida ne'ebé lae. Portantu situasaun siguransa iha munisipiu, suku no aldeia mosu oin-oin sadik KPK nia prezensa. Maibe iha resposta ne'ebé la'o FM nia observasaun katak ekipa avaliasaun tenta fo resposta balu maibe seidauk klaru kompetensia ida ne'ebé lolos maka atribui ba KPK no tuir kuadru legal saida maka KPK atua.⁵⁷

Iha diskusaun ne'ebé FM halo ho membru KPK Suku Manelima, Postu Administrativu Laclubar, Munisipiu Manatuto nian wainhira sira simu pose, membru KPK sira hato'o katak:

"Dadaun ne'e ami simu ona pose nu'udar membru KPK maibe ami mos presiza matadalan ida hodi ami la'o tuir no orienta ami nia serbisu. Tanba ami loron-loron hamutuk ho comunidade ho nune'e bele hatene ami idak-idak nia kna'ar. Ezemplu, iha Suku Manelima membru KPK reprezenta husi parte hotu-hotu hanesan veteranus, lia na'in, negociante, mestri, infremeiru no agrikultura nian. Maibe ami ladun komprende saida maka ami sei halo ka ami halo tuir deit kna'ar ami nian ne'ebé iha tiha ona".

⁵⁵ Relatoriu Departamentu Polisia Komunitaria Nasional – PNTL, tinan 2015.

⁵⁶ Hanesan deskreve ona iha footnote 55.

⁵⁷ Apresentasaun sumariu relatoriu monitorizasaun no avaliasaun ba Timor-Leste Community Policing Programme – TLCPP no Hametin Kooperasaun Hamutuk Polisia ho Komunitade – HAKOHAK husi ekipa avaliasaun kompostu husi Gordon Peake, Bu Wilson no João Almeida. Fundasaun Mahein sai mos partisipante iha diskusaun relatoriu preliminaru ne'e. Aprezenasaun relatoriu preliminaru ne'e hala'o iha loron 2 Setembru 2014 iha Salaun World Vision, Bidau – Dili.



2. *Monitorizasaun ba KPK no SV*

FM nia observasaun ba implementasaun KPK no SV iha munisipiu 11 hetan antusiasmu maka'as husi komidade. Iha ne'ebé komidade no lider komunitariu sira sente katak sira nia ejjensia hetan duni resposta husi Governu. Partikularmente prezensa polisia nian iha komidade. Nune'e mos komidade involve direta foti desizaun ba sira nia situasaun siguransa. Ne'e atu dehan katak involvimentu komidade nian komesa maka'as no sira hola parte nu'udar autor siguransa. Maibe niani lala'ok seidak iha monitorizasaun diak atu bele aseguira katak KPK no SV la'o nafatin iha ninia koridor.

3. *Kondisaun OPS nian iha suku*

Iha sorumutu sira FM halo ho OPS iha suku no Komandu PNTL Munisipiu sira hotu-hotu hato'o preokupasaun hanesan. Kondisaun ba OPS sira hanesan transporte, komunikasaun, hela fatin sai hanesan obstaklu ba sira durante hala'o serbisu iha suku. Portantu OPS sira mai husi suku ne'ebé diferente no dook husi suku ne'ebé OPS sira koloka ba.

OPS sira uza transforte privadu nune'e mos telemovel hodi komunika. Komidade sira kestiona OPS sira nia serbisu dalaruma problema ruma akontese atendentu OPS nian tarde liu, tan OPS la hela iha suku ne'ebé koloka ba. OPS sira susar atu komunika ho autoridade lokal sira dalaruma *saldo* komunikasaun la iha. Nune'e mos konvestivel la iha tan komandu la atesta ka la ense konvunitvel ba transforte privadu sira.⁵⁸

Maske OPS sira simu tiha ordem koloka iha suku maibe hela fatin ba sira la iha. OPS sira hela iha suku seluk ka OPS nia suku rasik ba halo serbisu iha suku seluk. OPS sira mos hato'o katak la'os deit halo serbisu nu'udar OPS iha suku maibe atende mos serbisu seluk iha eskuadra tanba número polisia la to'o. OPS sira mos dalaruma reforsa eskuadra hodi halo atendentu ba problema ruma iha suku seluk.

OPS sira mos halo dupla serbisu OPS nian iha suku rua ka tolu tan número polisia la to'o hodi kompleta suku seluk. Ho ida ne'e OPS sira dalaruma susar atu atende pedidu ruma husi komidade ka lider komunitaira wainhira prezisa OPS nia prezensa ka atende problema ruma iha tempu ne'ebé hanesan.⁵⁹

4. *Kooperasaun institucional*

⁵⁸ Menezes, Justinho, Superintendente (2014). Komandante Komandu Distrital Viqueque. Entrevista pesoal

⁵⁹ OPS sira hato'o iha sorumutu komunitaria ne'ebé Fundasaun Mahein halo iha Komandu Distrital Aileu iha fulan Marsu tinan 2014. Iha ne'ebé objetivu husi sorumutu ne'e atu rona kona-bá preokupasaun PNTL nian iha baze liu-liu kondisaun sira ne'ebé bele suporta diak liu tan PNTL nian serbisu iha distritu to'o suku.



Rekursu barak husi seitor siguransa nian iha Timor-Leste. Tantu dezenvolve husi insituisaun PNTL no instituisaun relevante seluk iha departamentu no dirasaun husi ministériu seluk nian. Inklui rekursu sira husi ONG sira ne'ebé implementa iha munisipiu no suku ne'ebé hanesan.

Rekursu hirak ne'e, iha Ministériu Interior ho nia estrutura prinsipal ida maka Dirasaun Nasional Prevensaun Konflikto Komunitaria (DNPCK) servisu ba prevensaun konflikto iha munisipiu 12 no rejiaun Oe-cusse. DNPCK nia estrutura dezenvolve ona nia estrutura operacional ida hodi koloka ninia pontu fokal iha munisipiu.⁶⁰

Nafatin iha Ministériu Interior ho nia estrutura seluk maka Dirasaun Nasional Siguransa Edifisiu Públiku (DNSEP) tau matan ba patrimóniu Estadu nian, halo vizilansia no prevene ba aktu kriminal balu ne'ebé kabe ba sira nia kompetensia. DNSEP estabese iha 2008 bazeia ba Artigu 43 husi Dekretu Lei 31/2008 ho responsabilidade prinsipál hodi garante seguransa no kontrolu asesu ba edifisiu no instalasaun administrasaun pública.

Iha Ministériu Solidaridade Sosial nia estrutura importante ida ho naran Departamentu Harii Paz no Koezaun Sosial (DHPKS). DHPKS iha objetivu hodi konsolida susesu sira iha área jestaun konflikto no promove prosesu harii pás ba tempu naruk iha comunidade sira. Estratéjia ne'e iha komponente prinsipál haat:

- *Institucionaliza mekanizmu no prosedimentu harii pás iha governu nasional;*
- *Hametin kapasidade no mekanizmu rezolusaun konflikto iha nivel komunitáriu;*
- *Hasa'e feto sira-nia partisipasaun no papél iha prosesu harii pás; no*
- *Dezenvolvimentu ne'ebé sensivel ba konflikto.*

DHPKS nia pontu fokal koloka ona iha munisipiu sira hodi halo serbisu sira ne'ebé departamentu ida ne'e tutela ba. DHPKS tulun husi parseiru dezenvolvimentu *United Nations Development Program* (UNDP) desde tinan departamentu ne'e harii.

Departamentu Polisia Komunitaria Nasional nu'udar departamentu ida iha Komandu Jeral PNTL nia okos. Nune'e Komandu Jeral PNTL tutela ba Ministériu Interior. Maske nune'e la iha kooperasaun entre departamentu no dirasaun iha Ministériu ne'ebé hanesan. FM nota katak kooperasaun sira ne'ebé durante ne'e akontese insidental deit. Atu hatete katak insidenti sira ne'ebé akontese lori sira la'o hamutuk maibe la ho kooperasaun ne'ebé formal hodi serbisu hamutuk.

Iha mos organizasaun seluk mai husi ONG sira, relijioza no organizasaun komunitaria sira. Nune'e mos rede nasional ida estabese ona husi Ministériu Interior liu husi DNPCK, involve ONG sira, polisia no instituisaun releventa seluk. Rede ida ne'e la'o deit ho atividade balu no la iha atividade fiksa tuir rede nia natureza.

⁶⁰ Relatoriu Fundasaun Mahein, tinan 2013.



Serbisu hirak ne'e nia baze iha suku no munisipiu. Dirasaun, departamentu no rede ONG sira hotu-hotu involve ema ne'ebé hanesan, iha suku ne'ebé hanesan, serbisu ba asuntu ne'ebé hanesan, mai husi dirasaun no departamentu ne'ebé diferente no iha instituisaun Estadu nian ida deit. Ezemplu ida iha Suku Hola Rua, Postu Administrativu Same, Munispiu Manufahe, Xefe Suku hanesan mos Mediator Nasional husi DNPCK nian, hanesan mos Prizidenti KPK no membru rede husi ONG ida serbisu prevensaun konflitu.

Kauza prinsipal ida tanba la iha kooperasaun instituisional ida ne'ebé diak hodi utiliza rekursu hirak ne'e sai forte. Maibe ida-idak la'o ketak-ketak maske serbisu ba asuntu hanesan, iha suku hanesan no involve ema ne'ebé hanesan mos.

Parseiru Internasional no Lokal sira

Doador importante sira durante ne'e suporta maka'as instituisaun PNTL hanesan Governu Nova Zelandia liu husi Programa *Timor-Leste Community Policing Programme* (TLCPP), *The Asia Foundation* (TAF) liu husi programa HAKOHAK finansia husi Ajensia Dezenvolvimentu Povu Amerikanu nian USAID⁶¹ no Ajensia Japones nian JICA. Tulun hirak ne'e hodi hakbiit Departamentu Polisiamentu Komunitaria Nasional no implementa polisiamentu komunitaria iha Timor-Leste.⁶²

TLCPP nia programa ho komponente importante tolu hodi suporta no hakbiit iha nivel estratejiku nian, operasional no treinamentu ba polisiamentu komunitaria. Nune'e mos HAKOHAK nia tulun hodi implmenta no pratika polisiamentu komunitaria to'o iha nivel suku. Parseiru importante seluk JICA hodi finansia atividade treinamentu no estudu komparativu iha Japaun no Indonezia.

TLCPP liu husi nia programa sira naktemi iha leten tulun mos PNTL hodi halo estudu komparativu iha Nova Zelandia ba ofisiais PNTL nian, Komandante Munisipiu ho nia Adjuntu no ofisial polisia komunitaria ho sivil balu. Nune'e mos fo asesoria ba PNTL, apoiu lojstika no finansia atividade sira polisiamentu komunitaria iha munisipiu no suku.

Iha implementasaun polisiamentu komunitaria, TAF liu husi programa HAKOHAK servisu hamutuk ho ONG lokal ida hanesan *Yayasan HAK* hodi implementa iha distritu

⁶¹ The Asia Foundation and National Police of Timor-Leste Host 2nd National Forum on Community Policing. Disponivel iha: <http://asiafoundation.org/news/2014/08/the-asia-foundation-and-national-police-of-timor-leste-host-2nd-national-forum-on-community-policing/>. Asesu iha lora 23 fulan Janeiru tinan 2015.

⁶² Programa Polisiamentu Komunitaria komesa redus krime sira. Disponivel iha: <http://www.pntl.tl/2014/08/08/programa-polisiamentu-komunitaria-komesa-redus-krime-sira/>. Asesu iha lora 23 fulan Janeiru tinan 2015



Dili, Ermera no Viqueque. Yayasan HAK nu'udar organizasaun direitus umanus harii desde 1996.⁶³

Partikularmente FM hola papel importante ida ba pratika polisiamentu komunitaria iha Timor-Leste liu husi relatoriu sira ne'ebé hasai ona ho rekomendasaun sira hodi instituisionaliza polisia komunitaria. Iha tinan 2013 nia rohan FM hasai ona relatoriu dahuluk ida kona-bá "Inisiativa baze kona-bá pratika polisiamentu komunitaria" iha ne'ebé nia baze peskiza maka iha distritu Aileu, Bobonaro, Liquisa no Unidade Polisia Maritima. Nune'e mos atividade seluk liu husi vizita rejional hodi halo kampaña kona-bá polisiamentu komunitaria ba Komandu Munisipiu sira, lider komunitaria no comunidade. Atividade ida ne'e finansia husi Ajensia ba Dezenvolvimentu Povu Amerikanu nia USAID.

Komandu Jeral PNTL mos hetan tulun husi Gabeti Prezidencia Repúblika Timor-Leste nian iha tinan 2013 ba atividade polisiamentu komunitaria. Inisiativa Prezidenti Repúblika nia hodi tulun ba atividade polisiamentu komunitaria tan vizita sira ne'ebé Prezidenti Repúblika la'o iha suku hotu-hotu iha teritoriu tomak comunidade nia eijensia maka presiza tebes prezensa polisia nian iha comunidade.⁶⁴

Konkluzan

Polisiamentu komunitaria mai ho nia istoria naruk desde instituisaun PNTL harii ho evolusaun ne'ebé la'o no matenek ne'ebé aprende husi rai seluk. Polisiamentu komunitaria hanesan filozofia PNTL nian no nia aplikasaun la hare ba unidade, departamentu ka seksaun no serbisu sira maibe ba membru PNTL hotu-hotu hala'o polisiamentu komunitaria. Maske nune'e sei iha interpretasaun ne'ebé diferente husi membru PNTL sira katak polisiamentu komunitaria hala'o husi Departamentu Polisia Komunitaria Nasional. Signifika katak durante ne'e seidak iha sosializasaun ne'ebé diak kona-bá Lei Organika PNTL nian no Planu Estratejiku PNTL.

Nune'e PNTL dezenvolve ona rekursu prinsipal ida iha comunidade iha asaun sira siguransa iha pratika polisiamentu komunitaria. Iha nível implementasaun atividade estratejiku kompostu husi KPK, SV, OPS no OPE. Atividade estratejiku hirak ne'e dezenvolve ona iha serbisu sira iha comunidade no envolve comunidade sira sai na'in ba asaun sira siguransa nian.

Maske nune'e sei iha difikuldade pertenente ida husi implementasaun polisiamentu komunitaria hanesan hela fatin ba OPS sira, transporte, komunikasaun no ekipamentu siguransa seluk. Inklui kooperasaun instituisional entre instituisaun Governu no sociedade sivil sira. Iha ne'ebé serbisu ba asuntu hanesan, husi insituisaun ka

⁶³ Programa HAKOHAK – Polisia Komunitaria. Disponivel iha: <http://www.haktl.org/ami-nia-programa/programa-hakohak-polisia-komunitaria/>. Asesu iha lora 24 fulan Janeiru tinan 2015.

⁶⁴ Guterres, Frei (2014). Asesor Casa Militar Prezidencia Repúblika. Entrevista pesoal



organizasaun diferente, involve ema ne'ebé hanesan, iha suku ne'ebé hanesan iha instituisaun Estadu nian ida deit.

Pontu prinsipal ida dadaun ne'e komponente tomak preokupa maka sustentabilidade implementasaun polisiamentu komunitaria iha Timor-Leste wainhira parseiru sira nia tulun ramata. FM fiar katak ida ne'e oportunidade ba Governu Timor-Leste atu kontinua tanba serbisu hirak ne'e lori ona benefisiu ba komunidadade. Ikus liu, serbisu hirak ne'e hametin relasaun polisia ho komunidadade no hametin konfiansa komunidadade ba polisia. Ho atuasaun sira polisiamentu komunitaria no profesionalismu.

Rekomendasaun

Ho ida ne'e FM rekomenda:

1. Parlamentu Nasional Komisaun B ne'ebé ho nia kna'ar prinsipal ida nu'udar orgaun fiskalizador ba asaun sira Governu nian kontinua fiskaliza implementasaun polisiamentu iha Timor-Leste. Hodi dudu Governu investe iha polisiamentu komunitaria tanba serbisu ida ne'e lori ona benefisiu ba komunidadade.
2. Governu kontinua dezenvolve no suporta polisiamentu komunitaria iha asaun sira konkretu ne'ebé lori ona konfiansa komunidadade nian ba polisia no komunidadade sai na'in ba asaun sira siguransa.
3. Governu ho Komandu Jeral PNTL kontinua facilidade, ekipamentu no eleva kapasidade polisiamentu nune'e iha atuasaun sira polisia nian ho profesionalismu.
4. Ministériu Interior, Ministériu Solidaridade Sosial, PNTL no Sosiedade Sivil presiza integra rekusu siguransa sira iha koordinasaun ida hodi sai forsa siguransa ida ne'ebé ho asaun ne'ebé koordinadu ba serbisu ne'ebé hanesan iha âmbito prevensaun konfliktu, krime no harii paz.
5. Komandu Jeral PNTL presiza dezenvolve mata-dalan serbisu ba KPK ho nia kadru legal sira hodi hases risku sira ba KPK ho monitorizasaun ida ne'ebé efektivu mos.
6. Enkoraza públiku no komunidadade sira kontinua partisipa ka involve iha asaun sira siguransa nian no kontinua hametin relasaun sira ne'ebé durante ne'e estabeselese ona entre polisia ho komunidadade.



Bibliografia

- Dekretu Lei Nú. 08/2004. Lei Organika Polisia Nasional Timor-Leste (PNTL).
- Dekretu-Lei Nú. 09/2009, Loron 18 fulan Fevereiru. LEI ORGANIKA POLÍCIA NASIONÁL TIMOR-LESTE (PNTL).
- Mata-dalan Postu Polisi Suku (PPS). Departamentu Polisia Komunitaria Nasional - PNTL. Tinan 2015.
- Mata-dalan Siguransa Voluntariu Suku. Departamentu Polisia Komunitaria Nasional – PNTL.
- Mata-dalan Treinamentu Materia Polisiamentu Komunitaria Timor-Leste. Departamentu Polisia Komunitaria Nasional – PNTL. Tinan 2015.
- Modelu Polisiamentu Komunitaria. Departamentu Polisia Komunitaria Nasional - PNTL. Tinan 2015.
- Planu Estratejiku Dezenvolvimentu Nasional (PEDN) 2011 – 2030.
- Planu Estratejiku Polisia Nasional Timor-Leste (PNTL) tinan 2014 – 2018.
- Planu Estratejiku Siguransa Interna 2030.
- Politika VI Governu Konstitusional ba seitor siguransa 2015 – 2017
- Relatoriu Fundasaun Mahein (FM). Inisiativa Baze Kona-bá Pratika Polisiamentu Komunitaria: Inisiativa Komandu Distrital Bobonaro, Aileu, Liquisa no Unidade Polisia Marítima. Tinan 2013.
- Relatoriu Providoria Direitus Umanus no Justisa (PDHJ) tinan 2014.
- Relatoriu Estudu Komparativu iha Nova Zelandia tinan 2013 no 2014 nian. Departamentu Polisia Komunitaria Nasional – PNTL.
- Relatoriu monitorizasaun no avaliasaun ba Timor-Leste Community Policing Programme – TLCPP no Hametin Kooperasaun Hamutuk Polisia ho Komunidade – HAKOHAK husi ekipa avaliasaun kompostu husi Gordon Peake, Bu Wilson no João Almeida.
- Relatóriu *The Asia Foundation* (TAF). Levantamentu Kona-ba Presepsaun Polisia Komunidade Iha Timor-Leste. Tinan 2013.



Aneksu 01: Enkontru no Konsulta sira

Naran no Instituisaun/Organizaun	Pozisaun	Total
<i>Komandu Jeral PNTL</i>		
Komisairu Polisia, Julio da Costa Horany	Komandante Jeral PNTL	1
Superintendenti Polisia, Natercia Martins	Komandante Operasaun PNTL	1
Superintendenti Asistente Polisia, Boavida Reibeiro	Xefe Departamentu Polisia Komunitaria Nasional	1
Inspetor Xefe Polisia, Helena das Dorres	Adjunta Xefe Departamentu Polisia Komunitaria Nasional	1
<i>Komandu PNTL Munisipiu Aileu</i>		
Superintendenti Polisia, Damiao da Silva Correia	Komandante PNTL Munisipiu Aileu	1
Martinho Matos	Administrador Munisipiu	1
Eskudra sira	Komandante Eskudra ka Postu Administrativu	3
PNTL Munisipiu Aileu	Membru	10
Xefe Suku	Prezidenti KPK	10
OPS	Vise – Prezidenti KPK	10
KPK	Membru	10
TAF – HAKOHAK	Koordenador Munisipiu	1
<i>Komandu PNTL Munisipiu Bobonaro</i>		
Superintendenti Asistente Polisia, João da Costa	Adjuntu Komandante PNTL Munisipiu Bobonaro	1
Domingos Martins	Administrador Munisipiu Bobonaro	1
Eskudra sira	Komandante Eskudra ka Postu Administrativu	4
PNTL Munisipiu Bobonaro	Membru	9
Xefe Suku	Prezidenti KPK	4
OPS	Vise – Prezidenti KPK	5
KPK	Membru	6
TAF – HAKOHAK	Ofisial TAF – HAKOHAK	1
<i>Komandu PNTL Munisipiu Covalima</i>		
Superintendente Polisia, Antonio Mauluta	Komandante PNTL Munisipiu Covalima	1
Eskudra sira	Komandante Eskudra ka Postu Administrativu	4
PNTL Munisipiu Covalima	Membru	15
Postu Polisia Suku	Komandante Postu Suku	2
Lider Komunitaria	Xefe Suku	8



<i>Komandu PNTL Munisipiu Manatuto</i>		
Superintendenti Polisia, Inacio Saldanha	Komandante PNTL Munisipiu Manatuto	1
Administrasaun Munisipiu Manatuto	Reprezentante Administrador Munisipiu Manatuto	1
Eskudra sira	Komandante Eskudra ka Postu Administrativu	4
Postu Administrativu sira	Administrador Postu Administrativu	1
PNTL Munisipiu Manatuto	Membru	15
Xefe Suku	Prezidenti KPK	5
OPS	Vise – Prezidenti KPK	6
KPK	Membru	4
<i>Komandu PNTL Rejiaun Oe-cusse</i>		
Superintendenti Polisia, Arnaldo de Araujo	Komandante PNTL Rejiaun Oe-cusse	1
Eskudra Polisia sira	Komandante Eskudra ka Postu Administrativu	3
PNTL Rejiaun Oe-cusse	Membru	11
Unidade Patrullamentu Fronteira (UPF)	Komandante no nia membru sira	8
Polisia Suku	OPS	4
Lider Komunitaria	Xefe Suku	6
Veteranus	Koordenador Rejiaun Oe-cusse	1
Lider Tradisional	Lia Na'in	1
<i>Governu no Parseiru Dezenvolvimentu sira</i>		
Frei Guterres, MSi	Asesor Casa Militar Prezidente Repúblika	1
Lidia de Carvalho	Diretora DNPCK	1
Adelio Tilman	Deputy Program Manager HAKOHAK – TAF	1
Francelino Guterres	Ofisial HAKOHAK – TAF	1
Dr. Gordon Peake	Konsultor ba Monitoring & Evaluation no Redesign Community Policing Programme Governu Nova Zelandia nian iha Timor-Leste	1
Dr. Bu Wilson	Konsultor ba Monitoring & Evaluation Community Policing Programme Governu Nova Zelandia nian iha Timor-Leste.	1
Polisia Nova Zelandia	Ofisila TLCPP	2



Aneksu 02: Lista Pergunta sira

1. Implementasaun polisiamentu komunitaria to'o iha ne'ebé ona?
2. Saida mak Departamentu Polisia Komunitaria halo ona?
3. Oinsa ita boot nia kompriensaun kona-bá polisiamentu komunitaria?
4. Se maka hala'o polisiamentu komunitaria?
5. Oinsa implementasaun KPK, SV iha suku?
6. Se maka involve iha KPK no SV?
7. Treinamentu saida maka halo ona?
8. Hanesan membru KPK no SV ita boot nia papel ne'e saida?
9. Susesu no difikuldade saida mak ita boot hasoru?
10. Se mak tulun PNTL iha implementasaun polisiamentu komunitaria?